

videntur, sed phantastica erunt. Vel si vera, Dei permissione ad mendacium trahent.

*Ideo mittet illis Deus:* (AUG., lib. xx, *de Civit. Dei*, c. 19.) Deus diabolum ista facere permettet, etc., usque ad alias injustissime judicatum.

**VERS. 12.** — *Primitias in salutem.* Ut scilicet non in illo periculo tempore ultimo, sed in primitiva Ecclesia crederemus in Christum, atque fidem confiteremur. Vel, nos apostolos primitias omnium creditum, quia apostoli primi credidissent, et hoc in salutem omnium gentium.

**VERS. 13.** — *In acquisitionem glorie Domini nostri Iesu Christi.* Vel, ut sitis acquisitio, in qua Deus glorificetur.

**VERS. 15.** — *Et dedit consolationem.* Promittendo celorum regnum. *In gratia.* Id est per gratiam quam dedit, speramus aeterna. Vel haec omnia dedit non merito nostro, sed in gratia sua.

### CAPUT III.

**VERS. 1.** — *De cetero, fratres, orate.* Orandum essehortatur, ut dignetur Deus doctrinam suam infatigabili cursu dirigere et transfundere per ora apostolorum in aures audientium, et ab auribus in corda, ut compescantur malorum seditiones.

**VERS. 2.** — *Ut liberemur.* A pseudo, ne nostros seducant, vel nobis insidias tendant. Vel, liberemur ab importunis, id est infidelibus qui resistunt verbo Dei, nec stant in portu quietis. *Et malis,* qui persequuntur infideles. Ideo dico liberemur, quia nondum acceperunt omnes fidem per me qui accepturi sunt. *Non enim omnium est fides.* Id est, nec vobis orantibus omnes sunt credituri, sed tantum praordinati in adoptionem filiorum.

**VERS. 6.** — *Denuntiamus.* De curiosis incipit et otiosis, nomine bonos ut eos corripiant.

**VERS. 7.** — *Scitis quomodo oporteat nos imitari.* Et cum illi haec non faciant, debetis vitare. Vel,

A non ambulant secundum traditionem. Scitis enim quomodo me habui, quod in illis non videtis, quasi dicat: Non est opus ut exponam vobis eam traditionem quia eam scitis, quod non inquieti fuerimus, ut ii qui aliena negotia curant, vagantes hac illac.

**VERS. 9.** — *Sed ut nosme ipsos.* Notandum quis Apostolus non solum verbis docebat, sed hortabatur et factis. Idonei enim magistri est que docet verbis, operibus explere.

**VERS. 10.** — *Quoniam si quis non vult operari.* Dicunt quidam de operibus spiritualibus hoc Apostolum praecepisse, alioquin si de opere corporali hoc diceret, in quo vel agricultores vel opifices laborant, videretur sentire adversus Dominum, qui dicit in Evangelio: *Nolite solliciti esse, quid manducetis* (Mauth. vi), etc. Sed superflue conantur et sibi et ceteris caliginem obducere, ut quod utiliter charitas monet, non solum facere velint, sed nec intelligere, cum multis aliis locis epistolarum quid hic sentiat. Apostolus apertissime doceat. Vult enim servos Dei corporaliter operari unde vivant ut non compellantur egestate necessaria petere. Nec est contra illud quod praedictum est: *Nolite solliciti esse quid manducetis*, etc. Non enim hoc ideo dictum est, ut non procurent quantum necessitati sat est, unde honeste potuerunt, sed non ut ista intueantur, nec propter ista faciant quidquid Evangelii praconio facere jubentur.

**VERS. 11.** — *Curiose agentes.* Hoc factum abhorret disciplina Dominica, eorum enim deus venter est, qui foeda cura necessaria sibi provident.

**VERS. 13.** — *Nolite deficere.* Quia etsi operentur, possunt tamen nonnullis indigere. Et ideo monet, ne illi qui habebant unde servis Dei necessaria præberent, hac occasione pigrescerent. Non enim in reprehensionem venit qui humanus est in largiendo, sed hic qui, cum possit laborem ferre, otiose vult vitam agere.

## EPISTOLA I AD TIMOTHEUM.

### ARGUMENTUM.

Timothum instruit et docet de ordinatione episcopatus, et diaconii, et omnis ecclesiasticæ disciplinæ, scribens ei a Laodicea per Tychichum diaconem.

### CAPUT PRIMUM.

**VERS. 2.** — *Gratia, et misericordia, et pax a Deo Patre.* In hac salutatione tria ponit, quæ exoptat, cum in aliis tantum duo posuerit. *Misericordia* hic accipitur pro eo quod in aliis epistolis gratia dicitur, id est remissio peccatorum. *Pax* est tranquillitas animi, prælibatio aeternæ pacis. Haec communiter omnibus optari solet. *Gratia* vero quam hic addit, episcopis optatur, id est donatio Spiritus sancti, qua ministri Dei armantur.

**VERS. 3.** — *Sicut rogavi.* Post salutationem prius

D de pseudo repellendis: incipit hic legem adhuc tenetendam docentibus.

*Rogavi.* (AMB.) Dicit *rogavi*, ut affectum charitatis, et formam humilitatis ostenderet.

*Fabulis et genealogiis.* (AUG., lib. II *contra aduersarios legis et Prop.*, c. 4.) Hæreticus quidam iniamicus legis et prophetarum, existimat Apostolum hoc loco divina eloquia fabulas appellasse, etc., usque ad quod nusquam sacra pagina narrat.

**VERS. 4.** — *Genealogiis.* Genealogiae erant quibus quidam Judæi narrabant se esse de genere Abraham et David: quasi inde eis deberetur, vel quibus narrabant Christum non esse ex David oriundum.

**VERS. 5.** — *Finis autem.* In fide est ædificatione Dei, quia ex fide est spes, et inde charitas, quæ est adiunctio legis. Vel sic construe: Quidam docent

et intendunt fabulis et genealogiis, sed finis et impletio legis est charitas, quare non est opus aliis. *Præcepti.* Dicitur *præcepti*, pro *præceptorum*, quorum impletio est dilectio Dei et proximi. Unde : *In his duobus mandatis tota lex pendet et prophetæ (Matth. xxii).*

(*Avg., in psal. xxxi.*) Finis dicitur terminus, etc., usque ad cupiditas ergo refrenetur, charitas excitetur.

*Conscientia bona.* Conscientia pro spe. Ille enim ad id quod diligit se perventurum desperat, cui malæ conscientiæ serupulus inest. *Et fide non facta.* Vel, non factili et fragili, vel, in qua non quisque sibi quodlibet singit, sed catholica duntaxat.

**Vers. 6.** — *A quibus.* Improbat hic adversarios, qui legalia tradebant.

*Non intelligentes*, etc. Si quando enim de prava et falsa opinione sua reprehendi et convinci cœperint, ad defendendum id quod levissima temeritate et apertissima falsitate dixerunt, de sanctis libris multa verba pronuntiant, volentes esse legis doctores, cum tamen non intelligant quæ loquuntur, vel de quibus.

**Vers. 8.** — *Scimus autem.* Ne videretur legem incusare, addit : *Scimus autem*, etc. Sed ne iterum videatur eam inducere, subjungit : *Scientes hoc, quia justo non est lex posita* : quia non ex ea est justus, sed ex fide. Ad quid igitur ei necessaria est lex? Ideo data est, ut vel reum puniret, vel peccare voluntem coerceret. *Justus tamen*, et si ea non eget, uitetur, ut sic esset in auctoritate aliis, et futura attestaretur factis. *Legitime utatur.* Qui scit ad tempus datam esse legem et sub Christo deserit. Jam justis per remissionem non est opus lege, a qua liberi sunt per Christum. Lege autem legitime utendi multiplex est modus, ut secundum aliud justus, et secundum aliud injustus recte dicatur legitime uti lege. *Injustus enim ea legitime utitur*, quando intelligens quare data sit, ejus comminatione tanquam pädagogo perducitur ad gratiam, per quam justus fiat. *Justus vero et illa legitime utitur*, cum eam tenendo injustis imponit, ut cum injustis cooperit inolite concupiscentiæ morbus incentivò prohibitionis, et cumulo prævaricationis augeri, confugiant ad justificantem gratiam, et per eam suavitate justitiae delectati pœnam litteræ minantis evadant.

**Vers. 12.** — *Gratias ago ei qui*, etc. Hic ostendit mala sibi fuisse in lege. Bona vero ea; dimissa, quod fidelis est, et positus in ministerio, unde et fortis : per quæ ostendit legem post Evangelium humiliiter duci.

**Vers. 13.** — *Sed misericordiam Dei.* Consequuntur misericordiam et qui scienter peccant, ut David, et qui ignoranter, quod facilius ignoscitur. *Misericordiam consecutus sum*, ex eo quod ignorans feci. Vel ignorantia ponitur causa misericordiæ non tam proprie, cum mala fuerit ignorantia, misericordia vero gratuita.

**Vers. 14.** — *Superabundarit.* Super majora bona

A quam olim mala. Quia non solum peccata dimisit, sed fidem et dilectionem dedit. De quibus nulli est ambigendum : *Quia Jesus Christus venit in hunc mundum peccatores salvos facere.* Et iste sermo est fidelis, id est verus et acceptabilis, quia utilis.

**Vers. 15.** — *Omni acceptance,* quia corpus et animam salvat. Vel, humanus est sermo iste. Alia litera : *Ut non dicam divinus*, quia si homo qui hospitio suscipit hominem, humanus dicitur, quanto magis humanus est qui in seipso suscipit hominem. *Quia Christus Jesus.* Nulla causa veniendi fuit Christo, nisi quod peccatores salvos faceret.

**Primus.** Id est pejor, quia persecutor, quo prior non erat : Nemo enim acrior inter persecutores, ergo nemo prior inter peccatores, primus ergo erat B non ordine temporis, sed magnitudine iniquitatis.

**Vers. 16.** — *Sed idcirco misericordiam*, etc. Cæterum idcirco misericordiam se fuisse consecutum judicat, ut nemo jam peccator quibuslibet sceleribus pressus, de se desperet, imo eamdem se consecutum veniam hoc exemplo præsumat : magnum valde ac revera ingens est donum. *In me.* Quem idoneum Deus gentibus prædicatorem constituit, in quo tantum exemplum misericordiæ sua exhibuit.

**Vers. 17.** — *Invisibili.* Quia cæteri dii sunt visibles. Non dicitur *soli invisibili*, quia sunt et creature quædam invisibles, ut anima, quæ tamen sensu capi possunt : quia omnes vires ejus possunt cognosci, sed ea non est nobis Deus. Invisibilis est ergo ab omnibus Deus in natura, secundum illud : *Deum nemo vidit unquam.* Videtur autem cum vult et sicut vult, non sicut est, sed quasi specie vult apparere. In futuro vero videbunt eum filii sicut est. *Soli Deo.* Qui solus Deus est natura, id est, solus creat, quod de ipsa Trinitate intelligitur, non de solo Patre, ut quidam volunt : quia non ait, soli Patri, sed soli Deo. Unus enim et solus Deus a nobis prædicatur ipsa Trinitas. Et unigenitus, secundum quod est Deus apud Deum, et Spiritus sanctus in sua natura est immortalis et invisibilis.

**Vers. 18.** — *Hoc præceptum.* Postquam commemoravit quæ et quanta sint beneficia Patris et Christi erga peccatores, quomodo populum imbuat disciplina ecclesiastica ostendit.

**Vers. 19.** — *Conscientiam.* Vocat cogitationes, in quibus summopere humilitas servanda est, qua spela in magnos quidam devenerunt errores, sicut in principio ad Romanos ostensum est.

**Vers. 20.** — *Quos tradidi.* Urumque Apostolus excommunicavit, ut hoc modo excludatur a Satana regnum Satanæ. Nulla enim creatura est, sive quæ in veritate manet dans Deo gloriam, sive quæ in charitate non stetit quærens gloriam suam quæ, velit nolit, divinæ providentia non serviat. Sed volens facit cum illa quod bonum est. De illa vero quæ hoc non vult, fit quod justum est. Non ei tamen rependitur quod de ipsa juste fit, sed quo animo ipsa facit, quia neque liberam voluntatem

rationabili creaturæ Deus negavit, sed potestatem quia injustos juste ordinat sibi retinuit. *Tradidi.* Non tamen ita ut pereant, quia nihil potest Satanas, nisi permisus, qui vexat sibi datos, unde: *Jam noli peccare, ne deterius tibi contingat* (*Joan. v.*) Itaque Satana ad correptionem hominum utebatur ipsa potestas apostolica. Prævaricatores enim angeli cum principe suo diabolo recte dicuntur procuratores, vel actores divinæ providentiae, et diabolus magistratus hujus mundi dicitur, sed magistratus sub Deo imperatore non facit nisi quantum illi permititur, et procuratores actoresque hujus mundi nibil faciunt nisi quantum Dominus sinit.

## CAPUT II.

**VERS. 4.** — *Obsecro.* Hactenus de pseudo-apostolis, hic de orationibus. *Primo omnium.* Id est, ante omnia fieri obsecrationes. Ordo missæ hic ostenditur quod est speciale genus orationis. *Obsecrationes.* Sive precationem illam quæ sit juxta vel ante consecrationem. *Orationes.* Id est ipsa consecratione. *Postulationes.* Vel interpellations, quasi ex debito ut quod hic geritur, in æterna vita perficiatur, ut cum populus ab episcopo benedicitur. *Gratiarum actiones.* De factis, que totum concludunt quasi totum sit a Deo: ut benedicamus Domino. *Pro omnibus.* Ut sequamur clementiam Dei, quia Deus vult omnes homines salvos fieri, etsi secundum justitiam quosdam reprobat. *Ut quietam a persecutione.*

**VERS. 3.** — *Hoc enim.* Ne quis putaret hæc non esse facienda pro his quos patitur Ecclesia addit: *Hoc enim bonum est.* Et ne quis putaret cultu unius Dei et vita bona salutem esse posse sine participatione corporis Christi, id est sine fide Ecclesia. *Unus,* inquit, *Deus, unus et mediator,* ut omnes homines salvari nunquam fiat nisi per mediatorem Deum Verbum quod semper erat, secundum tamen carnem, factum est.

**VERS. 4.** — *Mediator Dei,* etc. Hie est arbiter ille, quem Job desiderat, dicens: *Utinam esset nobis arbiter.*

(*Aug., lib. ix de Civit. Dei, c. 15.*) Mediator inter Deum et homines, oportebat ut aliquid haberet simile Deo, etc., usque ad alias bonus, qui reconciliat inimicos, Jesus Christus.

**VERS. 7.** — *Et veritate.* Futura veritas est res et merces fidei. Quæris, mercedem? fides præcedat. Credimus enim ut cognoscamus, non cognoscimus ut credamus. Quid est enim fides, nisi credere quod non vides? fides ergo est, quod non vides credere. Veritas, quæ credidisti videre.

**VERS. 8.** — *Volo ergo viros,* etc. (*Aug., serm. 93 de Tempore.*) Levavit Christus pro nobis manus suas in cruce, etc., usque ad ut veniant tibi in mentem opera tua.

*Ira, ad proximum; disceptatione, ad Deum.*

**VERS. 9.** — *Non in tortis,* etc. Ne his omnibus ultra personæ sue modum et mores occasioni mo-

A vendæ concupiscentiae studeant, sed potius per omnia bona opera sint promittentes et indicantes extra pietatem animi.

**VERS. 11.** — *Mulier in silentio.* Orandi officium dixit convenire omnibus, et qualiter, et pro quibus, et quare, et quod ubique orandum sit. Nunc dicit, quod docendi officium solis viris convenient, et quales ad illud debeant ordinari, determinat.

**VERS. 12.** — *Docere,* etc. Ecce non solum habitu tunissem et honestum habere mulierem docuit, verum etiam auctoritatem docendi ei negavit, et subjiciendam viro præcepit, ut tam habitu quam obsequiis, sub potestate sit viri ex quo trahit originem.

**VERS. 14.** — *Adam non est.* (*Aug., lib. ii de Gen. ad litteram, c. ult.*) Cum enim prævaricatorem dicat Apostolus in similitudine prævaricationis *Adæ, etc., usque ad nullum modo illum arbitror potuisse seduci.*

**VERS. 15.** — *Salvabitur.* Etsi mulier fuit causa peccati, tamen salvabitur non solum virgo et continens, sed etiam rupta, etsi nunquam ab opere nuptiarum cessans, si per generationem filiorum, incedens, ab hoc mundo exierit. Si permaneris in fide et dilectione et sanctificatione, ut propter proprium virum alterum non cognoscat. *Cum sobrietate.* Id est temperantia, ut proprio etiam viro temperate utatur.

## CAPUT III.

**VERS. 1.** — *Bonum opus desiderat.* Opus, non dignitatem, laborem, non delicias, non crescere fastigio, sed humilitate decrescere, ut fiat servus et minister hominum propter Christum, ut etiam intermissa Rachele decora facie, sed non relicta, cum Jacob intret ad Liam oculis lippam, et de monte cum Moyse descendat ad campos, de otio contemplationis ad laborem actionis.

**VERS. 2.** — *Irreprehensibilem.* Idem quod ad Tatum, sine crimine. Res pene contra naturam, ut sine peccato: sed eligatur, cuius comparatio ceteri greci dicantur. *Unius uxoris virum,* etc. Id est monogamum post baptismum. Si enim et ante conjugem habuit quæ obierit, non ei imputatur, cui prorsus novo, nec stupra, nec alia quæ ante fuerunt jam obsunt. *Sobrium,* etc. Ministri templi prohibentur vinum et siceram bibere, ne ebrietate graventur corda eorum, et ut sensus vigeat, semper tenuis sit.

**VERS. 3.** — *Non cupidum.* Nihil præter victimum et vestitum querentem.

**VERS. 6.** — *Ne in superbiam.* Nescit monasterius sacerdos humilitatem, modos personarum, vel se contemnere non jejunavit, non flevit, non se corredit, non pauperibus erogavit. In arrogantium, quæ est ruina diaboli, incidunt qui puncto horæ needum discipuli, flunt magistri.

*Oportet autem,* etc. Hæc clausula congruit principio, quod irreprehensibilis sit non solum a domesticis, sed ab alienis, Judæis, gentibus, hæreticis,

ut qui religioni detrahunt, juri ejus detrahere non A  
audeant.

VERS. 10. — *Nullum*, etc. Crimen est peccatum grave, accusatione et damnatione dignissimum.

VERS. 15. — *Ecclesia*. Multorum convocatio ad Janus Dei cultum. *Columna veritatis*. In se bene sustinens veritatem ne corruat, licet tribuletur.

VERS. 16. — *Apparuit angelis*. Non in Deo tantum innotescit angelis quod absconditum est, sed et hic apparet eis, cum efficitur atque propalatur; ideo dicitur apparuisse angelis non jam in forma humilitatis sed in potestate; qui ergo prius visus humilis, devicta morte, in maiestate apparuit, ut agnoscentes angeli mysterium quod prius latuit, declaratum in carne, genu illi flectentes quasi Deo gratias B agant, quia didicerant veritatem. *In mundo*. Ut perfidia mundi veniam erroris mereri non possit. Sicut Dominus dicit de Judæis: *Si non venissem, et locutus eis fuisset, peccatum non haberent*, etc. (Joan. xv.).

#### CAPUT IV.

VERS. 1. — *Spiritus autem manifeste dicit*. Quæ sibi futura Spiritus sanctus revelaverit ad instructionem et cautelam Ecclesiæ; non tacet dicens futuros pestiferæ doctrinæ viros, ut præmonita Ecclesia sit sollicita, ne ab hujusmodi hominibus circumveniatur, quasi dicat: Ita est digna domus Dei, sed *Spiritus manifeste dicit*. Et ideo pro ejus sublimitate ne curam deponas.

VERS. 2. — *Cauteriatam*. Cauterium est ferrum a cavendo dictum.

VERS. 3. — *Quos Deus creavit*. Haec doctrina sanctorum, illa dæmoniorum.

VERS. 5. — *Sanctificatur*. Sanctus fit cibus et salubris, non noxius animæ vel corpori, verbum sanctificat, oratio impetrat, diabolus vero per cibum tentat.

VERS. 8. — *Nam corporalis*. Datur hic intelligi quod vigiliis, jejuniis, orationibus et bonis operibus se exercebat Timotheus, non adeo intentus operibus misericordiæ. *Pietas*, quæ operatur bona fratribus et valet ad promerendum Deum.

VERS. 11. — *Præcipe hæc*. Monet eum, ut profectus ejus per omnia exemplum esset aliis, ut in adolescenti mirabilis videretur, et gravis disciplina, ut actus ejus excusarent et non quasi juvenis sed quasi senior habeatur, et erubescerent maiores natu, si non exhiberent se juxta formam hujus, conversatione et moribus graves.

VERS. 14. — *Prophetiam*. Vocavit prophetiam inspirationem sancti Spiritus, per quam præsciebat quid de hoc et de cæteris esset acturus. Ideo ait: *Quæ data est tibi per prophetiam*: quia Spiritu revelante cognovit Apostolus Timotheum esse dignum episcopali honore. *Presbyteri*. Pro presbyterorum, quia minus tribus esse non possunt. Et vocat presbyterum, episcopum; vel quia unus manus imponit cæteris assentientibus.

#### CAPUT V.

VERS. 1. — *Seniorem ne increpaveris*. Ne, indigne ferens se a minore correctum, magis exasperetur quam proficiat.

VERS. 2. — *Ut sorores*. Ut videntes se amoris causa commoneri, facilius se corrigan. *In omni castitate*. In alloquo juvencularum recte juvenis de castitate admonetur.

VERS. 3. — *Viduas honora quæ vere viduæ sunt*. Hoc est, quæ omnium suorum auxilio destituta sunt, et quæ manibus laborare non possunt, quas paupertas debilitat, ætasque conficit: quibus Deus spes est, et omne opus, oratio.

VERS. 4. — *Parentibus*. Parentes sunt iidem, qui superius filii et nepotes. Unde et in mundana lege parentis parenti jubetur per gradum succedere. Quibus mutnam vieem reddimus, cum a patribus educati sumus, et alias pari lege nutrimus.

VERS. 5. — *Desolata, sperat*. Videns ex nulla parte se habere suffragium, toto animo est devota Deo, de quo solo sperat auxilium vite et salutis.

VERS. 6. — *Quæ in deliciis*. Genus est imposturæ honorem viduæ habere velle, et non obsequi Deo et aliud agere, aliud profiteri, cum profiteatur reliquæ.

VERS. 8. — *Curam non habet*. Cura impendenda parentibus, ut Jesus matrem Joanni commendavit.

VERS. 10. — *Pedes*. (Aug., in Tract. 58 in Joan.) Faciamus hæc invicem humiles, quod humiliiter fecit C excelsus, etc., usque ad confirmatur humilitatis effectus. *Sanctorum*. Quorum obsecro? Eorum, qui in tribulatione sunt, non sanctorum simpliciter: possunt enim esse sancti, summoque obsequio ab omnibus forandi. Noli hos prosequi copia rerum affluentes, sed afflictos, et qui a multis ignorantur. Noli præsuli Ecclesiæ ista tribuere partienda, ipse potius ministra, ne solius impendii, verum obsequii præmium percipias: propriis eroga manibus, tu sulcum sere pietatis.

VERS. 11. — *Devita*. Id est, vota castitatis earum non usque ad eo cures, ut eas Ecclesiæ alimonii sustentandas suscipias.

VERS. 12. — *Habentes*. (Aug., de Bono viduitatis, cap. 8, 9, 10.) In conjugali vinculo si pudicitia conservetur, damnatio non timetur, etc., usque ad omnis hujusmodi similis est uxori Loth, quæ retroaspexit.

**D** Irritam fecerunt. Etsi non nubendo, tamen volendo: non quia nuptiæ damnentur, sed fraus propositi, et fracta fides voti damnatur et voluntas, quæ a proposito recedit damnabilis est, sive nuptiæ sequantur, sive non.

VERS. 15. — *Conversæ sunt retro Satanam*. Ab excellenti illo viduæ vel castitatis virginalis proposito in posteriora respiciendo ceciderunt et interierunt.

VERS. 17. — *Qui bene*. De honore presbyterorum hic agit, quasi dicat: Illud quod dixi de viduis observa: et hoc etiam præcipe de presbyteris, ut pre-

sbyteri, qui bene præsunt vita et doctrina, digni habentur.

**VERS. 19.** — *Adversus presbyterum accusationem noli recipere*, etc. Solet qui corripit non amari, et ideo habita occasione facile accusatur. Contra hoc monet, non esse recipiendam de facili accusacionem adversus presbyterum.

**VERS. 20.** — *Coram omnibus*, etc. (Auc., *serm. 16 de Verb. Dom.*) Aliquando debes corripere peccantem inter te et ipsum solum, etc., usque ad quando autem palam peccatur, palam argendum est.

**VERS. 21.** — *Testor coram Deo*. Id est, Deus sit mihi testis, quod animam meam salvavi tibi, cave.

**VERS. 23.** — *Noli adhuc aquam*, etc. Quia castitatem admonuit, hac occasione immoderatam abstinentiam prohibet, quam ipse inierat.

**VERS. 24.** — *Quorumdam hominum peccata*, etc. Quia dixerat sine prajudicio nihil faciendum, determinat ubi prajudicium sit necessarium, et ubi non, dividens bona et mala, in manifesta et occulta, quasi dicat: ideo opus est examinatione, quia sicut quædam sunt manifesta, quæ non oportet examinari, ita quædam sunt occulta, de quibus sine pra-examinatione non potest fieri prajudicium. *Manifestata*. Hoc dicit de iis, de quibus clarum est quo animo stant, hæc præcedunt ad judicium, quia si ista sequitur judicium, non est temerarium. *Subsequuntur*. Sicut quæ occulta sunt mala ipsa non latebunt tempore suo quando Christi tempus advenerit, quo manifestentur: sic et de bonis. De his ergo judicemus: illa Dei iudicio relinquuntur.

## CAPUT VI.

**VERS. 1.** — *Quicunque*. Sciendum est quosdam prædicasse communem omnibus in Christo libertatem. Quod de spirituali libertate utique verum est, non de carnali, ut illi intelligebant: ideo contra eos hic loquitur Apostolus, jubens servos dominis suis esse subditos. Ne exigant servi quod de Hebreis dicitur, ut sex annis serviant, et gratis dimittantur liberi, quod mysticum est.

**VERS. 4.** — *Superbus*. Superbia quippe, non eum ratio dicit, cum ad favorem querendum in conflictum prorumpat, quod a mansuetis et bonis vitatur. *Languens*. Non enim recusando fidem penitus moritur, nec ad veritatis scientiam convalescit, sed quasi repetitis accessionibus languet circa quæstiones et pugnas verborum, *Quæstiones*. Quæstio erat an servus esset, cum omnes ex eisdem patribus orti, et Christus omnes redemerit.

**VERS. 9.** — *Nam qui volunt*. Hoc dicitur his qui volunt et non sunt, ne desiderent. Jam divitibus aliud dicitur, scilicet non superbe sapere, sed dare pauperibus. *Incidunt in tentationem et laqueum diaboli*, quia radix omnium malorum, etc. Non est genus mali quod non ex cupiditate aliquando proveniat, quia radix omnium malorum est cupiditas.

**VERS. 10.** — *Cupiditas*. In Græco habetur, φιλαρ-

πία. Si ergo avaritia habetur quæ proprie est pecuniae amor, pro genere quod est cupiditas, ponitur species.

*Doloribus multis*. Avari enim tanto plus sollicitudinem cruciatus sustinent, quo amplius desiderant quæ vel habita transeunt, vel quæ habere non possunt.

**VERS. 11.** — *Tu autem, homo*, etc. Non dicit quou hoc timeat de isto, sed sciebat hoc venturum in manus ecclesiarum. *Hæc fuge*. Nihil enim tam aspernum tamque perniciosum quam si vir ecclesiasticus maxime qui sublimem tenet locum, divitiis hujus saeculi studeat: quia non solum sibi ipsi sed et cæteris obest, quibus contraria dat formam. *Pietatem*. Pietas est ut egenti condescendamus, quod non facit cupidus. *Fidem*. Qui veram fidem habet de Deo, non cupidus in miseriis fieri dives, nec pluris est ei mundus, quam Deus.

**VERS. 13.** — *Præcipio tibi*. In Timotheo omnibus successoribus loquitur Apostolus. *Et Christo Iesu*. Exemplo Christi hortatur.

**VERS. 15.** — *Beatus et solus*, etc. Hoc non de Patre tantum dicit, sed de Deo qui est ipsa Trinitas.

**VERS. 16.** — *Qui solus habet immortalitatem*. Habet per naturam, alii ab eo per gratiam. *Inaccessibilem quem nullus hominum*. Quia nullus ad eam ex se accedit sed cui datur, dono ejus datur, quod intelligebat Propheta dicens: *Accedite ad eum*, et illuminamini (*Psal. xxxiii*), etc.

**VERS. 17.** — *Divitibus hujus saeculi*. Supra egit de his qui divites volunt fieri, dicens eos incidere in temptationem et laqueum diaboli, hic agit de his qui divites sunt, monens eos non sperare in divitiis. Et quia dixit mala venire ex cupiditate, et contra suavitatem, ne viderentur divites abjecti, determinat. *Non sublime*. Non expavit Apostolus divitias, sed mortuum earum, id est superbiam, quæ est vermis divitium. Grandis animus est, qui inter divitias isto morbo non tentatur. Magnus est qui non se ideo magnum putat, quia dives est. Qui autem ideo se magnum putat, superbus est, egenus est, in carne turget, crepat in corde, mendicat, inflatus est, non plenus. *Ad fruendum*. Temporalia enim in hac vita dat Deus ad utendum, æterna ad fruendum: illa, unde bona faciamus; ista unde boni efficiamur.

**VERS. 19.** — *Thesaurizare*. Ad hoc præmittuntur divitiae non periturae.

**VERS. 20.** — *O Timothee*. Timotheus, pretiosus deo. *Tímoς* pretiosus, Θεός Deus.

*Profanas*. Ut est, *hypostasis*, quæ vox se habet ad personam et ad substantiam. Unde et heretici sub hujus nominis multiplicatione inducere volebant tres esse substantias. Profanas voces intellige quæ sunt contra religionem, aliae non sunt vitande.

**VERS. 21.** — *Promittentes*, circa fidem exciderunt, etc. Nihil enim sic amant isti, quam scientiam promittere, et fidem rerum verarum (quas credere parvuli præcipiuntur) velut imperitiam deridere.